

19 de martzu: Festa de totu sos babbos

Ogni annu su 19 de su mese de martzu si festant totu sos babbos. Pro ite su 19 de martzu? Sa data est istada seberada pro motivos religiosos. In su calendàriu de sa Creja in custa die si festat Santu Zusepe, babbu putativu de Gesus e s'ìmbulu de sa figura de su babbu. Su cultu de Santu Zusepe benit dae s'Oriente, mancarì chi sos primos a lu difùndere siant istados unos cantos padres benedetinos a pustis de s'annu Milli, sighidos in fatu dae s'ordine de sos Servi di Maria in su sèculu su de XIV e dae sos frantziscanos in su Batormentos. Est istadu Paba Sistu VI a fàghere marcare sa festa in su calendàriu romanu. In su 1871 sa Creja catòlica proclamat Santu Zusepe amparadore de sos babbos de famiglia e patronu de sa Creja.

Su babbu est una figura importante e ùnica. Est cussu chi ti dat sa manu, chi ti amparat e ti mustrat s'àndala de sa vida, sena ti lassare mai. Babbu cheret nàrrere cosas medas e a custa paràula devimus rispetu e carignos. A totu sos babbos dedicamus custa poesia iscrita dae Antiogu Casula, nòdidu comente Montanaru, poeta famadu de Dèssulu.



A babbu meu

Troppu has babbu meu tribuladu
Pro lassare a sos fizos calchi cosa;
E i sa fronte serena ispaziosa
Has in duros tribaglios sudadu.

E s'anima tua bona, generosa
Dolores e isventuras hat provadu;
Como ses pili canu iscunfortadu,
Poveru babbu! Sedidi e riposa.

Riposadi serenu accantu a mie
Chi t'amo tantu foras de manera.
Est tristu s'ierru umanu, est tottu nie,

Ma t'allegret su coro cudd'ispera
Chi fizu tuo offerit tottu a tie
S'ardore de sa sua primavera.

